



MOCIÓN POLA DIGNIDADE, A MEMORIA E A XUSTIZA DAS VÍTIMAS DO TERRORISMO (NO XX ANIVERSARIO DO ASASINATO DE MIGUEL ÁNGEL BLANCO)

O Grupo Municipal do Partido Popular, ao abeiro do Regulamento Orgánico Municipal, presenta, para a súa inclusión no Pleno, a seguinte **MOCIÓN**:

EXPOSICIÓN DE MOTIVOS

O xoves 10 de xullo de 1997 produciuse o secuestro de Miguel Ángel Blanco pola banda terrorista ETA. A través dunha chamada telefónica a un medio informativo, a propia banda terrorista informaba do secuestro do concelleiro de ascendencia galega de Ermua (Biscaia) e daba un ultimato ao Goberno: se en 48 horas non anunciaba o traslado de todos os presos vascos a Euskadi, Miguel Ángel Blanco morrería.

Os peores augurios confirmáronse. ETA asasinouno a sangue frío, falecendo o domingo 13 de xullo de 1997.

Ao coñecer a noticia da súa morte, as manifestacións de repulsa e actuacións espontáneas sucedéronse en toda España e de forma moi especial en Galicia, de onde procedían os seus pais. Aquel movemento cidadán foi coñecido como “o Espírito de Ermua”, que supuxo un cambio transcendental na historia de Euskadi e de España e o avance do sentimento de condena e rexeitamento das accións violentas.

Miguel Ángel Blanco é a día de hoxe un símbolo de loita democrática contra o terrorismo, da inocencia de todas as vítimas do terrorismo e de solidariedade social. Millóns de persoas en Galicia e en España recordamos aqueles días de xullo no que saímos á rúa no intento de salvar a vida dun mozo comprometido co seu municipio e cos seus principios.

Habería outras moitas vítimas do terrorismo en España, pero sen dúbida o maior número de atentados con morte foi obra de organizacións terroristas, fundamentalmente a banda ETA e o GRAPO, que desde os anos 60 do pasado século, durante a Transición e ata épocas recentes se estima que asasinaron a máis de 800 persoas, das que máis de 60 eran naturais de Galicia, perpetraron 3 asasinatos en Santiago –foron vítimas Manuel Vázquez Cacharrón, Pedro Cabezas González e Constantino Limia Nogueiras- e, polo menos, temos constancia do falecemento en atentado dun natural do concello de Santiago, o garda civil Ricardo Couso Ríos, asasinado hai 26 anos en Biscaia. Sen esquecer a María Mercedes Domínguez, vítima da explosión provocada en outubro de 1990 polo Exército Guerrilheiro na desaparecida sala Clangor do barrio da Rocha.

Todas as vítimas da barbarie terrorista deben merecer a lembranza e recoñecemento da sociedade a través das formas, actos ou espazos que dean conta dunha realidade que é preciso coñecer e condenar hoxe e de cara ao futuro.

Nesa liña, co paso dos anos, máis de un centenar de concellos de toda España téñenlle dedicado espazos públicos ou monumentos en vilas e cidades á memoria de Miguel Ángel Blanco, atendendo ás solicitudes da Fundación que leva o seu nome, e outros moitos están á espera de facelo.

Ante a proximidade da data na que se cumpren dúas décadas desta trágica morte, desde o Grupo Municipal do Partido Popular, consideramos fundamental que a Corporación da capital de Galicia leve a cabo unha homenaxe que referende a repulsa e a condena da loita armada, do terrorismo e de calquera forma de violencia que trate de vulnerar a vontade popular, o Estado democrático e a Constitución que ordena a legalidade vixente e garante as liberdades públicas.

Para iso, propoñemos que con motivo do aniversario do asasinato de Miguel Ángel Blanco, na súa memoria e na de Manuel Vázquez Cacharrón, Pedro Cabezas González, Constantino Limia Nogueiras, Ricardo Couso Ríos e María Mercedes Domínguez se coloque nun lugar notorio –que ben podería ser a Praza da Constitución- unha placa cun texto en recordo das vítimas e rexeitamento do terrorismo en España.

Por todo iso, o Grupo Municipal Popular propón ao Pleno do Concello para a súa consideración a adopción do seguinte

ACORDO:

Primeiro.- O Concello instalará unha placa na Praza da Constitución da cidade de Santiago de Compostela á memoria de Miguel Ángel Blanco e as vítimas do terrorismo en España, na que conste a seguinte lenda: “En memoria do XX aniversario da morte de Miguel Ángel Blanco, concelleiro de Ermua de ascendencia galega asasinado pola banda terrorista ETA o 13 de xullo de 1997, do Garda Civil compostelán Ricardo Couso Ríos asasinado en Biscaia, das persoas asasinadas en Santiago de Compostela Manuel Vázquez Cacharrón, Pedro Cabezas González, Constantino Limia Nogueiras e María Mercedes Domínguez, así como a todas as persoas que deron a súa vida polas liberdades públicas, que foron vítimas do odio e da intransixencia daqueles que lexitiman a forza, a violencia e o medo para mudar a vontade popular. Santiago de Compostela, xullo de 2017.”

Segundo.- O Concello daralle traslado do presente acordo ás asociacións de vítimas do terrorismo, á “Fundación Miguel Ángel Blanco” e aos familiares das persoas lembradas no texto coa finalidade de obter o seu beneplácito para esta acción e, posteriormente, convidalos ao acto de descubrimento da placa.

Santiago de Compostela, a 11 de xullo de 2017



Agustín Hernández
Portavoz do Grupo Municipal Popular

Sr. Alcalde do Concello de Santiago de Compostela